

爾

雅

補

注

爾雅補註序

爾雅補註四卷海甯周松靄先生未刊遺書之一也先生名春字苞兮松靄其號晚稱黍谷居士乾隆甲戌進士官廣西岑溪知縣嘉慶庚午重宴鳴鹿卒年八十六事蹟載朱緒曾讀書志海昌勝覽下而吳振棫續杭郡詩輯小傳中列先生是書謂爲已刻又云未刻者有爾雅廣疏不知廣疏卽補註異名見本書王序則考之不實矣此爲歸安姚氏咫進齋藏抄本板心記有字數若干殆擬刻入叢書而未果者書中二三四卷過錄盧抱經朱筆校閱字一行又有朱筆眉批疑亦抱經校語又黑筆引吳葵里云云葵里爲吳冕牀先生騫別號與先生至交亦當時往來商榷

隨手校註者姚書散出展轉爲余得之余喜其援據精詳雖不如邵郝二義疏之整齊要勝于翟戴二家補註之淺略是亦可以傳矣爾雅漢立博士唐入試科至宋有鄭夾漈爾雅註羅鄂州爾雅翼專門之書補郭註之未詳正邢疏之已誤與陸農師埤雅實可鼎足一時乃近世註疏諸家多未稱引毋亦門戶不同歟先生是書折衷一是不以晚近而廢之是其集思廣益之心異於專已守殘之見昔臧在東先生庸錄漢人郭舍人李巡以下佚註爲爾雅漢註一書先生則取之於宋學後有治爾雅之學者得通其郵則誠可以觀於古矣光緒戊申九月朔長沙葉德輝撰

治經必先識字識字必先訓詁於今可見古人小學之傳
僅存爾雅一書其源實出於六書中之有轉注在初造字
者因有轉注而字形不窮故欲識字者因可轉注而字義
不昧也字書總彙古文無有重複自三蒼下逮續訓纂共
得一百三章章六十字計祇六千一百八十字班志明謂
六藝羣書所載略備然則漢初太史試學童必能諷書九
千字以上者乃得爲史字數尙多其又有時俗所增出於
羣書之外者邪後人釋字耑爲一書有從體製類聚者始
於象形有從音韻條分者始於諧聲其分散於經傳之下
爲音爲釋某字讀如某字有反有切是諧聲之轉注也字
有相似辨其疑誤訂其舛訛是象形之轉注也至字取指

事會意假借者亦必釋之而總以轉注爲綱其形聲不必同而其義本同彼此相資觀者自解其源始於至聖贊易乾健坤順震動巽入坎陷離明艮止兌悅直以一字解一卦爲千古經學之宗爾雅雖多爲解詩詞非全備間有錯謬然關係訓詁指陳名物實爲諸儒治經沿流溯源者導之先路宜乎班志列孝經後視他字書有異也自郭氏爲註陸氏爲釋文邢氏爲疏已列爲十三經後人精於六書發前人所未發則有夾漈鄭氏嗚乎俗儒專務詞章每恥言訓詁其於爾雅不久已束之高閣歟博物之難也近在經籍猶未遍識菴竹是一是二莧陸是合是分秬秠是異是同鑄鐘是大是小毛公不用釋山酈元讀有破句田敏

誤改日及王劭刊落明彙謝尙誚蔡謨而先不熟楊氏疏
穀梁而疑本文辨論所存難以枚舉然則以蛩爲蠅蠅以
蠹爲螻蛄以反舌爲蝦蟆以乾鵠爲蟋蟀以鴟鴞爲巧婦
以鷦鷯爲百勞一物偶疏尙虧該洽又何怪乎主司不能
答天雞致千載下猶羨終軍之能識鼯鼠也哉周君松靄
爲補注四卷旁搜廣採疏通證明又多出於夾漈之外卽
羣書釋經有當者以轉注是書其有功於郭注也蓋亦若
爾雅後有張揖能廣之陸佃能埤之羅願能翼之可以愧
夫名爲治經實則束書不觀游談無根者松藹張樊川太
史高弟也以余言質之樊川謂何如

乾隆庚辰夏天台齊召南

小學之失其傳也久矣爾雅一經多可恨者其正文往往爲後儒所亂如台朕陽爲予我之予賚畀卜爲賜予之子而云台朕賚畀卜陽予也孔魄延虛無爲間哉爲言之間而云孔魄哉延虛無之言間也豫爲厭足之厭射爲厭倦之厭而云豫射厭也此類皆正文爲後儒所亂者而郭氏皆不能辨且郭注傳而犍爲文學劉歆樊光李巡孫炎並亡郭之音圖亦亡卽郭注亦多有爲妄人刪去者非全本也如釋山霍山爲南嶽郭注云霍山今在廬江潯縣西南潛水出焉別名天柱山漢武帝以衡山遼曠因讖緯皆以霍山爲南嶽故移其神於此今其彼土俗人皆呼之爲南嶽南嶽本自以兩山爲名非從近來也而學者多以霍山

不得爲南嶽又云漢武帝來始乃名之卽如此言謂武帝在爾雅前乎斯不然矣凡一百有七字書詩周官正義竝引之詳略不同耳而今本但云卽天柱山潛水所出也餘悉刪去且郭意本爲辨衡山亦名霍山而廬江之霍山不得爲南嶽今一經刊削與郭本意轉大違反如此者甚夥又唐人正義每博採羣言以釋經注至邢氏疏則但勦取他經正義爲之如釋天一段全襲禮記月令疏五嶽一段全襲大雅崧高疏此類不可枚舉陸氏釋文于他經每引眾家之讀并及其異義而於爾雅惟存音切諸儒之說略不及之羊豹一尊殊無足觀爾雅之失其傳如此而俗師專已仍陋踵譌古義日就瞽昧余嘗病焉同榜進士海昌

周子芑兮成學治古文貪博嗜奇而一歸平正與余有獲
間取莆田鄭氏說又旁及他書預是有益者悉鈔內焉其
援引也富其詮叙也確信乎小學中必不可少之作也昔
者羅鄂州書雖名爲爾雅學實非解經若芑兮此編補經
注而行正義疏之體且其于注不但補其缺又能正其誤
而于邢疏漏略處裨益尤多則其所補又不特注而已也
余謂此書之美補注二字未足以盡之以是名書是爲實
浮于名夫自有十三經注疏而後之用力于經者言疏足
以見注言注不足以包疏爲寄語芑兮鄙意竊思以廣疏
易此名可乎同年弟嘉定王鳴盛西莊氏拜題于京邸青

棠軒

爾雅補注卷一

海甯周 春

幼時讀爾雅惟知景純後見夾漈注多補前
復好之郭博而鄭精是書無餘蘊矣因旁及諸家之說
彙爲一編頗以管見參之聊備遺忘并祛未寤云爾

唐國子學石經爾雅二卷一萬七百九十一字

文選羽獵賦注引爾雅犍爲舍人注又引釋詁郭舍人注
與景純不同疑舍人卽文學而與景純同姓邢疏未之詳
也

厚齋云爾雅疏引舍人云案經典序錄爾雅有犍爲文學
注二卷一云犍爲郡文學卒史臣舍人漢武帝時待詔按

雅注一
此則卽東方朔傳中人無疑然左傳正義中舍人文學竝引異說未解其故也

劉歆樊光注陸元朗俱疑爲依託健爲文學而下注釋之最古者李巡孫炎二家而已

諸家之說散見他書者惟李氏孫氏爲多按後漢書宦者傳汝陽李巡稱爲清忠巡以諸博士試甲乙科爭第高下更相告言至有行賂定蘭臺漆書經字以合其私文者乃白帝與諸儒共刻五經文于石于是詔蔡邕等正其文字自後五經一定爭者用息則巡固篤好經學之士刑餘得此爲難能也又按三國志王肅傳肅不好鄭氏時樂安孫叔然注云與晉武帝同名故稱其字授學鄭元之門人稱東州大儒徵爲

祕書監不就肅集聖證論以譏短元叔然駁而釋之又作周易春秋例毛詩禮記春秋二傳國語爾雅諸注又著書十餘篇叔然著述最富不獨爾雅顏之推謂古人音書止爲譬況之說孫炎漢末人撰音義獨知反語則其學博而業勤宜見重當時而傳于後世矣

沈璇休文之子集註爾雅當佳惜不傳

孫炎江灌施乾謝嶠顧野王曹憲俱有音在陸氏前釋智騫毋昭裔亦有音在陸氏後今惟陸氏釋文存

爾雅有圖有讚皆景純所作陳陳畱江氏亦有之今俱不傳惟傳景純之讚而已此夾漈所謂雖佚猶存可取諸爾雅以補之也

唐張彥遠名畫記云爾雅圖上下二卷陳尚書令江灌著
灌字德源武德中隋州司馬并著爾雅贊二卷音六卷

邢氏以孫炎高璉說皆淺近今孫說流傳尙多而高無片

語存者眞有幸與不幸也

吳葵里云邢昺所謂俗間有孫炎高璉淺近俗儒此孫炎乃別

是一人非魏之孫叔然也丁小正云是唐五代間人予按經義考列高璉于唐人前邢氏書孫炎又在璉上則此炎蓋亦唐人

人

按程敏政云爾雅疏序在舒館直雅集中題曰代邢昺作

按晁公武云文字之學有三其一體製說文之類是也其

一訓詁爾雅之類是也其一音韻四聲譜及西域反切之

學是也要之三家當相輔而行乃成專門之學

釋詁一篇周公所作張揖謂著以釋制禮之義傳乎後學

釋言以下仲尼子夏所增叔孫通所益沛郡梁文所補揚子雲以爲游夏之徒所記要之此乃詩家之解詁方言詩箋說文之學所從出也必欲定爲何人則難臆斷矣

詩釋文云釋詁樊孫等爾雅本皆爲釋故

春秋元命包言子夏問夫子作春秋不以初哉首基爲始何邢疏據此以定釋詁爲周公所作亦未確也

詩釋文載始也載哉義同

鄭云首元皆人之首也肇始闢戶也

按爾雅以膾訓大從巾而周禮注云膾又詁爲大二者同矣則是膾乃腠肉大膾賈氏云據爾雅釋詁文此似從肉作膾或所見異本也

詩旄邱云何誕之節兮雖云假哉皇考皆大也舊引誕彌厥月湯孫奏假者非姜上均說姜似未見鄭注然稍有不采今取其是者存之

劉說文从艸作剡音卓又音到

陞郭讀爲至故以極訓之釋文音質鄭云日照之所極也從釋文

艘釋文音宗不讀爲屈疏因注引宋曰屈而正文無屈字遂讀艘爲屈復云艘古屈字鄭從之然終屬牽合按說文云艘船著不行也此亦有至義則讀爲宗當無不可矣詩正義云假至釋詁文彼作格音義同

左傳正義云釋詁如往也往是相從之義故訓爲從嫁不引列子將嫁于衛

禁禦不若郭采合傳文鄭竟引不逢不若郭引永錫爾類
鄭引勤施無私曰類

省郭未詳記大傳有事省于其君注省善也善於其君謂
免於大難也釋文引爾雅息靖反

按詩敦弓既句句穀同此穀字可訓善不必訓張

怡夷通妣湛耽通弁槃通

如訓謀按卽論語如之何如之何之意熟思審處有謀義
也

肇郭云未詳疏引肇敏戎公鄭從之

姜上均以肇基二字連讀大謬

書正義云夏猶楷也言爲楷模之常故夏爲常也

辟有法臯兩義訓法者如字訓臯者婢亦切故釋文止于

訓臯者音婢亦切鄭于訓法者音婢亦切且云下同誤

郭注繇辭於乎皆語之韻絕鄭作語韻之絕之韻二字倒轉乃傳寫之誤

詩正義云詩本作述爾雅多作仇字異音義同

係鄭云亦作繫

顛顛二字郭云未聞其義而晉人若周若裴以之命名蓋止取靜義耳

隕碩郭云碩猶隕也方俗語有輕重耳疏云隕者石落也蓋泥春秋隕石之義鄭遂改隕作碩以爲隕土曰隕隕石曰碩似近穿鑿雖字書元有碩字不得輒改

遐郭云亦遠鄭云尤遠尤疑爲猶字之誤

尸窆也鄭云舊註謂窆地非此卽寮窆之窆故亦從窆而
下文又申云按鄭意以寮窆必有所主故訓尸而寮窆復
訓官也郭竟以窆爲窆地稍費解然窆地之窆本因官地
爲名其義亦可兼通大夫有窆地者爲窆而同爲大夫者
爲寮也

馬融字季長義本爾雅

兼魏晉時有命名者可見豹鼠旣辨之後無不畱心爾雅
風尙則然不獨宏農太守矣

詩正義云釋詁曰肩克也直以肩爲克耳傳言仔肩克也
則二字共訓爲克猶權輿之爲始箋亦曰仔肩任也雖所
訓不同亦二字共義按此肩上當脫一仔字

勗音泯與黽同音黽音密則黽之入聲亦卽勉之入聲故
黽沒猶黽勉音相近也

舍人云余謙卑之身孫炎云余舒遲之身二解俱精鄭云
身自己稱也張飛云身是張益德也

鄭云據予本予我之予又爲賜予之予樵疑此當言台朕
陽予也謂我也賚畀予也謂與也以二字同文故誤耳
陽如之何釋文音賜鄭如字

誘進也按玉篇姜進也今作誘知此誘字本作姜故注不
引吉士誘之而疏始引也

勵疏云不以力助以心助也此助與勵之別

鞏用黃牛之革固志也郭注誤合革遯二卦之文

禕音衣漢晉閒人多以命名疏云歎美也玉篇云美也歎
詞疏合爲一耳

睢睢詩正義作往往

關關囀囀音聲和也鄭云據二文一義者皆在釋訓部恐
誤在此按上文睢睢皇皇藐藐穆穆下連一文一義者亦
在釋言部此又因上文而連及之非誤也

囀囀一作噍噍

穀不引史記不穀于此

江東呼厭極爲鑿坊本誤磬

鄭云蒐通作搜樓通作樓

詩正義云箋荒虛釋詁文某氏曰周禮云野荒民散則削

之唯某氏之本有荒字耳其諸家爾雅則無之

鄭云阮有二文無義其一爲衍者耳疑徵爲侈

滕訓虛郭未詳愚意易咸卦滕口說之滕不必作騰字依此作虛字解尤爲直捷

濂廣韻作陳

觀姜上均謂當讀如象觀之觀乃多之象也按此說誤與釋言訓示者複矣

逐訓病郭未詳疏以爲卽詩碩人之軸古今字通鄭從之虺積元黃明是馬病而郭氏以爲通于人病反詆叔然殊不可解鄭云虺頽元黃劬勞皆二文一命也

詩釋文云如何里里憂也本亦作瘰爾雅作悝竝同

繇役以爲憂愁郭注最通鄭引王風中心搖搖以爲繇通作搖說似近鑿

愉鄭云心勞也或云卽瘳也

方言惟凡思也慮謀思也願欲思也念常思也數語釋訓最精思之貌曰愼蓋卽儼若之意舍人云愼恚而不得之思訓釋亦精

註引祓祿康矣今詩作弗當是齊魯韓三家之文裁卽菑故訓危郭未詳何也

譏釋文音祁郭讀作剡汽音蓋今俗讀汽可小康之汽如乞者非

周昌口吃故稱期期疏因杜元凱訓期而引之無謂

治訓故郭未詳鄭疑爲始

竺鄭作竺注云與篤同古文工卽馬字

載者言而不信謨者謀而不忠故訓僞鄭以郭注爲臆說
釗我周王當卽泰誓昭我周王孟子昭我周王見休故有
見義也

文選運命論脈脈然注引爾雅脈相視也郭璞云脈脈謂
相視貌也按卽後覩胥相也而與此誤合爲一

鞠訓訓盈鄭云訓無盈義但引文耳

延鄭云卽埏隧道也

之言二字語辭也姜氏曲爲解釋穿鑿無理姜氏于郭注
所未詳者必巧爲之說甚乖蓋闕之義雖或十得其一然

可資捧腹者良多

今考製琴徽止而軫動則徽亦止也

姜上均說

郭引孟子行或尼之此必傳寫之誤非郭注誤引也鄭仍依郭作行

亭林云桔直也古人以覺爲桔禮記緇衣引有覺德行作有桔德行注未引

鄭云較較然也頌不屈也

柔某氏引詩懷柔百神

詩釋文矢其文德毛傳矢施也爾雅作弛式氏反

鄭云暴樂樂卽燥也毗未詳按毛傳劉爆燥而希也則毗亦當以一文爲一義而郭鄭均未之詳郭又似以毗劉二

文連爲一義

鄭云覲翳蒼也髮蒙茸也芾茂盛也離謂草木披離按此以字別爲義也未知卽孫叔然之說否郭氏以覲髮二文爲一義芾離二文爲一義謂草木之叢茸翳蒼也芾離卽彌離彌離猶蒙龍耳二說竝通郭以字別爲義爲失亦正不必

疏引舍人云楨正也築牆所立木也所以當牆兩邊障土者也按也下所以上脫幹字以左傳正義校

鄭云肩勝作也迪開作也倣始作也

亭林云尙書俱作茲論語俱作斯大學以下之書俱作此語音有輕重亦時代爲之也詩與檀弓亦多作斯

文選注引爾雅嗟楚人發語端也不知誰氏之注

詩大雅孔塤不甯毛傳云塤久也正義云釋詁塵久也古書塤與塵通故以爲久

書正義云孫炎曰陳居之久久則生塵矣古者塵陳同也故陳爲久之義

淹鄭箋引之作奄想古字相通也然則奄有三義久也同也蓋也

鄭云塵積久也伫俟久也

拒鄭云卽振也郭解爲訊卽釋言所云振訊也

於鄭云更辭也釋文音烏依鄭注當如字

禮記正義引爾雅歆喜興也學記不興其藝注歆也喜也

與今本廡熙不同蓋所見各異耳

衛蹶訓嘉鄭云今時俗訝其物則曰衛當是閩語蹶與衛亦不

相遠但方俗語有差耳按鄭氏此說亦未確

詩正義云釋詁咽息也某氏引詩民之攸暨郭璞謂今東齊呼息爲咽則暨與咽古今字也

鄭云臻重至也迺也侯維也維亦乃也乃引辭也按重至別是一義與迺無涉

書正義云迪道也釋詁文聲借爲導導音與蹈同故迪又爲蹈也

書正義云釋詁胥皆也相亦有皆義故通訓胥爲相

文選注云爾雅胥相也謂相戒勗以所好尚也可備一說

胥當爲聿來胥字之胥舊引胥盟爲証誤

姜上均說

毛傳假以溢我溢訓順按古慎順字通王肅及崔申毛竝作順解非也

書思曰贊贊襄哉馬云襄因也釋文云爾雅作儻

儻卽君夷襄我二人之襄從陳施博士乾讀疏云郭無明說義得兩通

犍爲舍人注云獻珍物曰珍獻食物曰享

書正義云釋詁元首首也元與首各爲頭之別名此以元首其爲頭也按今本上首字作良與正義異

禮記正義云釋詁文元是首故爲大也按此乃轉相訓元良首也按注未引尙書一人元良當以二文爲義

揚鄭引揚名于後世

文選注爾雅昵近也孫炎云親之近也今本昵作暱

貉縮晉時俗語亦然鄭未詳

律疏云律管所以述氣鄭云卽聿字鄭說爲長

疑當讀魚乙切音屹詩桑柔靡所止疑是也舊讀如字引

書疑謀勿成爲証而謂疑者亦止其釋非是

姜上均說

亭林云元者本也本官曰元官本籍曰元籍本來曰元來

唐宋人多此語後人以原字代之不知何解爾雅原再也

易原筮周禮馬質禮記月令原蠶文王世子末有原漢原

廟

師古注原重也言已
有正廟更重立也

之原皆作再字解與本來之義全

不相同或以爲洪武中臣下有稱元任官者嫌于元朝之

官故改此字古人亦有稱原官者後漢張衡應閒曩滯日
官今又原之注爾雅曰原再也衡爲太史令去官五載復
爲太史令故曰原之然則原官乃再官之義也

原犍爲文學作蠹郭注從之故不引易原筮禮記末有原
孝經正義云釋言爽差也爽忒也轉互爲訓故忒得爲差
周禮注聽賣買以質劑釋文引爾雅劑剪齊也

毛傳剪齊也箋訓斷正義云剪齊釋言文齊卽斬斷之義
故箋以爲斷其義同也

詩正義引李巡云圉守取之無所擇也解未明晰

膺身親也按身親二字注似連讀疏仍別爲二

周禮疏云田畯農夫也以其教農故曰農夫

麻左傳正義引舍人注作秣

詩正義云慘曾爾雅本或作慤曾音義同

詩維周之禎毛傳云禎祥也正義云釋言文舍人曰祺福之祥某氏曰詩云維周之禎定本集注祺字作禎按今本爾雅仍作祺

記云繭酌用茅明酌也是茅明也之義舊引左傳前茅慮無者非

姜上均說按二文可兼引

俛注引書俛爾干稱作俛戈作干當是古文故鄭云通作稱

詩正義云冥幼釋言文爾雅本或作窈孫炎曰冥深闇之窈也某氏曰詩噦噦其冥爲冥窈

鼂李巡作鼂

周禮注樊及纓皆以五采屬飾之疏引爾雅

詩釋文烘孫炎音恭

康之爲苛亦猶亂爲治故爲今徂爲存擾爲馴之類疏引
州吁阻兵安忍殊鑿

詩正義云庶彫釋言文舍人曰庶眾也彫多也孫炎曰庶
豐多也云彫然則彫亦肥多之義按今本彫作侈

按詩釋文孫炎曰方木置水爲柎棧也今疏引之作舫水
中爲柎棧也互異

舫柎犍爲文學作坊埶

洵均也某氏引詩其下侯旬見詩正義

局分也文選注作近也

砧疏從釋文音苦角切卽確乎其不可拔之確字說文別有砧苦八切石堅也義雖小異其字則同鄭音苦八切誤縞韃爲文學作縞注云縞羅也介別也鄭云說文謂縞以絲介履

務侮也郭引外禦其侮鄭云疑侮爲敏

賄財也詩云以我賄遷周禮太宰鄭注布帛曰賄止此一字便見詩人體物之工

渝韃爲文學作濡玉篇濡又作渝

烝不引烝在栗薪見鄭箋詩正義云倉兄填兮之填音塵孫炎曰烝物久生塵則塵爲久義古者塵填字同故填得

爲久

宛犍爲文學作跳注云跳者躍之間按此閒字讀如字釋文音閑然終當從去聲讀

亭林云郵過也注道路所經過是以爲郵傳之郵恐非古人以尤爲郵詩賓之初筵是曰旣醉不知其郵禮記王制郵罰麗於事國語夫郵而效之罪又甚焉家語芾而麇裘投之無郵漢書成帝紀天著變異以顯朕郵五行志后妾當有失節之郵賈誼傳紛紛其罹此郵兮亦夫子之故也谷永傳封氣悖亂咎徵著郵外戚傳班婕妤好賦猶被覆載之厚德兮不廢捐于罪郵叙傳正諫舉郵是皆過失之義列子魯之君子迷之郵者則又以爲過甚之義文選注

盧諶贈劉琨詩春同尤良用乏驥綠李善引杜氏左傳注
郵無恤王良也尤與郵古字通按亭林此說正可與注並
存以郵元兼兩義也

左傳正義引前覆曰踣又引前覆曰仆俱孫炎說按踣與
仆同

僨僵也鄭作强傳寫之誤

疏以虹通作訏引抑篇實虹小子召旻蝨賊內訏本陳顧
氏野王說見釋文

閭臺也與釋宮重出

鬱氣也不引左傳鬱攸從之

握疏引夏屋本詩箋鄭從之故云握卽屋字李巡本作幄

按此當引詩握粟出卜李郭鄭竝誤

訊注不引毛傳振羽訊鄭云當作迅謂奮迅

詩釋文燬郭璞又音貨

周禮注云夜是明之首不通於前宵是昏之末不通於後
惟夜中之時正一名耳

舊本音囚說文从心曹聲白疏誤與棕合爲一唐韻以下
遂有棕音

樊光云行相逃謂之道

左傳正義引李巡云啟小跪也

詩正義云純著新綿爲襦雜用舊綿爲袍雖著有異名其
制度是一故曰袍襦也

牙注一
犍爲舍人云覲擅也

文選注階因也麗附也樓牽也翥舉也演廣也斟酌也今本俱闕蓋因小爾雅廣雅諸書而誤否則傳寫之誤也

鄭云一字本一言一言本一義饘是饘飭是飭不得謂飭爲饘訊自訊言自言不得謂訊爲言襦自襦袍自袍不得謂袍爲襦袞自袞黻自黻不得謂袞爲黻不獨此也大抵動以數十言而總一義今舉此四條亦可知其昧於言理條條犍爲文學作攸攸

矯矯犍爲文學云得勝之勇也

洸洸犍爲文學僨僨當與趙趙通

踏七夕反坊本誤脫七反二字音夕

薨薨犍爲文學作雄雄

委委佗佗犍爲文學作禕禕它它注云心之美也按此卽

禕訓美之証

吳葵里云按釋文禕禕它它是引顧舍人語蓋顧野王也此以爲犍爲文學未知何據

偁偁不引尙書偁爾干

萌萌說文作藹藹存也古痕切

赫赫犍爲文學作奭奭

躍躍樊光作濯濯

郭云悠悠偁偁丕丕簡簡存存懋懋庸庸綽綽盡重語者言此數字單言之其義亦同但古人有重語者故複出之以上見疏而注無之當是郭舍人也

旭旭郭氏讀爲好好疏有而注無蓋亦舍人之說鄭不取

夢夢訥訥健爲文學云煩懣亂也

居居究究惡也如字然依郭注又似去聲終當從孫說
仇仇無倫理之貌敖作毀俱健爲文學說毛傳云仇仇猶
瞽瞍也正是毀義疏又以敖瞽瞍三字爲音義同
眦眦健爲文學云形容小貌

舍人云釋釋猶霍霍解散之意見詩正義

鄭云奉璋峨峨謂助祭之士執圭璋峨峨然釋言峨峨祭
也伐木丁丁丁者伐木聲也鳥鳴嚶嚶嚶者鳥聲也
奈何曰丁丁嚶嚶相切直也舉此三者可以知其不達物
之情狀

按自藹藹萋萋臣盡力也以下至速速蹙蹙惟速鞠也本

文有韻注亦用韻語甚奇古間有似七言句者此時七言未盛行尤難得也憂無告也當作入聲音谷

詩正義云舍人曰藹藹賢士之貌萋萋梧桐之貌用此傳爲說箋以梧桐喻君德爾雅言臣盡力與此箋不同者以君有盛德則能使臣盡其心力與爾雅合也釋訓又曰雖雖喈喈民協服也不爲鳳凰鳴此傳與爾雅異者毛意以爲由萬民協服故鳳聲雖和亦得合爾雅也

脩脩樊光作悠悠

皋皋樊光作浩浩

詩正義云釋訓灌灌憂無告也解其言灌灌之意耳非解灌灌之義故云猶款款言日至誠款實而告之但彼不受

用卽是無所告耳

搖搖樊光作遙遙又作洮洮鄭云搖卽搖也

述疏云急迫也鄭云及也念及窮迫也

粵并同峯蜂同掣摩同

不俟之俟說文作𦵏

饕健爲文學作喜注云古曰饕

禮書云爾雅雩號祭也女巫凡邦之大裁歌哭而請杜預以雩爲遠誤矣

如切如磋數語入爾雅不過尋常訓詁耳入大學便有爾許精義純景叔明見其粗洛閩諸公見其大便覺迥別
癰籀文作癰

敏健爲文學作畝注云古者姜嫄履天帝之跡于畝畝之中而生后稷按此因拇畝同音沿誤而曲爲之說

李巡云張姓仲字其人孝故稱孝友

善父母善事也善兄弟善處也孔氏穎達云不言善事父母兄弟者以見非但善事而亦爲父母兄弟之所善諸行周備之意也此論亦好

籛條巧言也戚施令色誘人夸毘卑身屈己也俱健爲文學說李巡以夸毘爲足恭便僻其足前卻以爲恭敬與郭稍異

夸毘字書一作𠙴𠙴

釋親一篇非周公孔子不能作所謂名者人治之大端也

可不慎歟

鄭云凡此所命或有義或無義但取稱呼之異

國語晉悼公見民年七十者稱曰王父按爾雅乃孫稱祖之詞悼公敬老故亦借以相稱今人猶然可見其君賢而俗樸矣偶見我邑前輩廬司業軒說如此潤色存之

亭林云古人于父之昆弟必稱伯父叔父未有但呼伯叔者若不言父而但曰伯叔則是字之而已詩所云叔兮伯兮伯兮姆兮叔于田之類是也

父之從祖舅弟爲族父下脫從祖父之子相謂爲從祖舅弟朱子云今本皆脫此句

兄之子弟之子相謂爲從父舅弟朱子云此句合在姑之

下從祖父之上

厚齋云白虎通引親屬記卽爾雅釋親也通典顏延之曰伯叔有父名則兄弟之子不得稱姪從母有母名則姊妹之子不得言甥且甥姪惟施于姑舅耳雷次宗曰姪字有女明不及伯叔

按儀禮謂吾姑者吾謂之姪正與爾雅之說互相發明

甥字有男見

不及從母劉其父刊二程先生集改姪爲猶子朱文公謂古人固不謂兄弟之子爲姪亦無云猶子者但云兄之子弟之子然從俗稱姪亦無害於義理也姪有兩音今世俱從帙音無復讀如徒結反者

姑之子爲甥四句四甥字俱止當生字解故曰通稱與下

文謂我舅者我謂之甥不同

離孫卽左傳所謂彌甥

白虎通云謂之舅姑何舅者舊也姑者故也舊故者老人之稱也謂之姊妹何姊者恣也妹者末也謂之兄弟何兄者況也況父法也弟者悌也心順行篤也稱夫之父母謂之舅姑何尊如父而非父者舅也親如母而非母者姑也故稱夫之父母爲舅姑也

朱子云同事一夫則以生之先後爲長少各事一夫則以夫之長幼爲先後所謂從夫之爵坐以夫齒者是也單舉則可通謂之姒蓋相推讓之意耳注疏非是

此篇當以劉熙釋名中釋親屬一篇參看劉氏所釋甚有

精義

釋名中釋天釋樂器二篇俱精

終

爾雅補注卷二

海甯周 春范兮

宮謂之室室謂之宮范氏寧云其實一也鄭云互名也
禮書云屨亦作依欲其有所依荀卿曰居則張容負屨容
之爲物蓋若唱射之容爾雅容謂之防郭璞謂如曲屏風
觀此則天子張容之制可知矣然禮言負黼屨則張容不
畫黼矣按牖戶一作戶牖

東西牆鄭云今謂之壁陸氏隴其云序廂通在堂上近牆
曰序統言曰廂非如今人指堂下廊廡爲廂也

奧與隩通書厥民隩正義引之

宦鄭云飲食之所

竈說文戶樞聲也玉篇於帛於鳥一切引爾雅東南隅謂之竈竈亦隱闇一作窔

禮書云儀禮于房室言墉于堂下言壁牆之卑者也牆其總名

朽御覽引此作圻說文鏐鐵圻也

椹文選注作砧

周禮疏云爾雅地謂之黝牆謂之堊黝黑也堊白也又云黝先鄭讀爲幽幽是北方其色黑取黑義也知堊是白者以與幽黑白相對故知是白按古用蜃灰飾牆所謂白盛是也

周禮注云櫝謂之杙可以繫牛疏云充人置櫝入地之時

櫨櫨然作聲故以聲名其官曰櫨人職櫨聲相近誤爲職
禮記正義云柄謂之節卽山節之節李巡本節作棗

植鄭云立木於門中所以鍵固管鑰

禮書云輶末謂之宇疆境亦謂之土宇又謂之邊垂則宇
與垂皆檐之窮也故輶末疆境取名焉自屋言之曰檐自
堂言之曰垂按檐說文作閭

文選注引兩階閒曰闕許亮反廣韻作嚮

禮書云爾雅門屏之間謂之亾詩侯我於著著亾一也
西陽雜俎云今人多呼殿棖桷護雀網爲采思誤也禮記
明堂位疏屏天子之廟飾也注云屏謂之樹今采思也刻
之爲雲氣蟲獸如今闕上爲之矣按釋名廣雅古今注諸

書皆謂屏爲采摠蓋有屏之狀而實則小牆也

禮書云爾雅觀謂之闕禮器云天子諸侯臺門謂之闕以其闕中也謂之魏以其巍巍也謂之象以其懸法象也臺門以其高於垣墉若臺然也又謂是蕭牆漢志未央宮東闕采摠災先儒謂爲屏采摠采摠小樓也城隅闕上皆有之屏上亦然故稱屏曰采摠然則先王觀闕之制宜如此按屏謂之樹觀謂之闕舊說相沿爲一非是蓋屏卽上文展畫斧形者若今屏風然闕則所謂采摠也不得誤混開亦作祈蓋祈祭於此故卽以爲門名

孫炎曰宮門雙闕舊章懸焉使民觀之故謂之觀周禮注廟中之門謂之闈按疏以爲爾雅文蓋廟制與宮

通也

按考工記明堂之制門堂

注門側之室

較堂修廣得三分之二

其餘左右塾可類推矣

衙音弄與巷通巷胡絳切亦音弄詩侯我乎巷離騷家巷是也

堂途周禮注作堂涂謂若今令璧祊也疏云令璧今之博祊則博道也祊音階

初學記引注云旁出岐多故曰劇康樂也莊盛也言交道康樂繁盛崇多也多道會期在此按此蓋孫氏注而疏采之不全

左傳疏云釋宮九達謂之達說爾雅者皆以爲四道交出

復有旁通故劉氏規過以達爲九道交出也按四達謂之衢衢達音同故說者因之而誤

左傳釋文爾雅達說文作𨔵云九達道似龜背故謂之𨔵按室中謂之時玉篇時作𨔵徐氏切上也注引爾雅觀此可知爾雅本作𨔵後誤作時疏因曲爲之解時然後動尤無義理

無室曰榭爾雅有此文楊氏穀梁傳疏云或以爲爾雅無此文惟云有木者謂之榭有之者本或誤也按此說大謬可笑因看前不看後故以爲無此文楊氏不知駁正反証其有室無室豈未之深考耶

鄭云木豆薦菹醢竹豆薦棗栗菱芡脯脩糗餌之屬瓦豆

薦羹皆祭祀燕享所用按陳氏祥道云登儀禮作鐙則亦金爲之

康瓠李巡作光瓠文選注李巡曰大瓠瓢也又史記注如淳曰大瓠也應劭曰康空也按陳氏祥道云壺之爲器其體有大小其制有方圓非必皆瓠爲之特取名於瓠壺而已

犍爲文學云斲斲鉏也一名定郭從之李巡云鋤別名也廣韻作拘櫛

詩釋文樛舊詩傳及爾雅並作米旁參郭景純改爾雅從小爾雅作木旁孔氏曰樛字諸家本作米邊積柴之義也然則樛用木不用米當從木爲正

王風雉離于羅又云雉離于罌雉離于罌三物相似轉以相釋或作一物者非又詩本謂張以取兔而雉反離之此卽魚網之設鴻則離之之義故孫氏謂爲掩兔之具而注疏皆云用以捕鳥亦失之矣

姜上均說

兔罟謂之罌坊本上罟誤作罌從禮記疏校

罟疏云罌也較注更明晰

文選注爾雅毚罟謂之羆羆或作毚音罟

分當如字不當音粉言律管可以平分氣候

大版謂之業孫炎以業爲所以飾枸乃樂懸之飾不與下文繩之相連也郭因詩有縮版以載遂以爲築牆之版要之樂懸之飾元有大版則名業而築牆亦有大版名同義

異可以並存也

周禮疏云彝爲上卣卽犧象之屬爲中罍爲下司尊彝與爾雅同按左傳正義引孫炎曰罇彝爲上罍爲下卣居中卽此說也

衣褊鄭云衣縷謂縫也

屨緣亦曰純見儀禮

稭廣韻賤存二音

禮書云衿衣之小帶也褊佩之衿也鄭氏謂凡佩繫于革帶則革帶者褊也

文選注云今之香囊在男曰幃在女曰綯又云婦人之徽謂之綯

縠一作襍

輶音痕釋文缺

槩鄭云飯半腥半熟也本李巡

李巡本魚曰作之正與內則合郭依樊光本作斲

見禮記正義及

公羊傳疏

斲謂削鱗

樊光曰斲也

解誤緣欲與上文脫字一例耳

鄭云據公食大夫禮鮓則鮓也音祈觀此文勢上下相敵則鮓又疑於涪屬

康疏云米皮也鄭云今作糠

澱疏云滓泥也鄭云卽澄泔之澤

弁上鄭云斂口也款足郭云曲腳鄭云張足也按陳氏祥道云先儒皆以款爲空太史公自序曰實中其聲者謂之

端實不中其聲者謂之窾則款非曲也

鬲亦作鬲此下或多舉鼎具謂之鉉一句注貫耳以舉鼎者未知何本

禮書云爾雅旄謂之龍山海經有牛獸如牛四節有旄此旄牛也荀卿書曰西海有文旄班固地理志秦西近邛笮有旄西方之產也其尾可以飾旗亦可以飾舞

白蓋之蓋音閣鄭如字

錫疏云今白鑑也

錫曰白鑑鉛曰青鑑

此俗鑑字所出

鍰詩釋文所引爾雅乃小爾雅也故今本爾雅無此文
鍰廣韻或作礪割玉篇或作錯義並同

文選注引玉謂之雕雕作琬注琬與彫古字通

鄂州云釋器象謂之鵠角謂之翬犀謂之鵠玉謂之鵬取
四鳥之名不知其故按翬从角割从刀玉從佳惟鵠亦音
斛並非从鳥鄂州何以穿鑿若此况尙有木謂之剡一句
耶

廣韻畢俗从金作鐸

鄭云緩聲爲不律急聲爲筆郭云蜀人呼筆爲不律許叔
重云吳人謂之不律觀作爾雅者多用江南音命物恐許
氏之言是矣

李巡注云鏃以金爲箭鏃也

金鏃翦羽謂之鏃坊本鏃亦誤鏃

左傳正義云李巡孫炎二說雖反皆以弭爲弓末按郭從

孫說

周禮典瑞璧羨以起度司農謂羨長也康成謂羨不圓之貌疏云按爾雅肉倍好謂之璧則璧體圓矣今云璧羨羨是引伸而言是爲長意故先鄭後鄭皆爲不圓也

鄭云好孔也執璧必手拏其孔

按爾雅所言言染赤也周禮所言言染黑也蓋染黑亦必由赤耳

賴周禮注作窺

文選注青謂之葱樹木茂盛之貌

文選注引爾雅理玉曰琢蓋卽雕謂之琢注云治玉名也唐人避諱治爲理

施李巡作簀音時

左傳正義云釋器簀謂之第孫炎曰牀也郭璞曰牀版也然則牀是大名簀是牀版檀弓云大夫之簀與簀名亦得統床故孫炎以爲牀也

禮記鄭注引爾雅赤緣謂之祿今本無此文疑是一染謂之緣之注

禮書引爾雅公矛三隅今本無此文

按禮書先儒謂宮音重而尊商音明而敏角音約而易制徵音泛而不畱羽音渙散而抑按此蓋經一作約迭一作畱柳一作抑也

敏與重義相對五聲角居中當爲經漢志訓徵爲繁盛之

意羽爲藏聚之意則迭亦爲繁柳亦爲聚也歟

姜上均說

沈約宋書樂志引爾雅比今文詳略小異蓋以注稍加潤色者如瑟二十七絃者曰灑大琴曰離二十絃磬形似犁以玉爲之大曰鞀笙十九簧者曰巢簾大者尺四寸圍三寸曰沂埴大者曰𪔐大鐘曰鏞中者曰剽小者曰棧懸鐘磬者曰筍簾橫曰筍縱曰簾簫編二十三管尺四寸者曰言十六管長二寸者曰筴管長尺圍寸并漆之有底大者曰箛中者曰篴小者曰箛簫如笛三孔而短小七孔大者曰產中者曰仲小者曰箛

御覽云離二十絃或傳此是伏羲所制

厚齋云爾雅小壘謂之坎大琴謂之離萬物之象無非易

也又閻潜北云更有轡首謂之革康謂之蠱和樂謂之節
按此俱偶與易卦同名未必取象說殊鑿也

鄭云犁鎗曲刃也

巢亦作簣言亦作筭仲亦作箒

孫炎注釋樂一篇最爲穿鑿至於從舍人訓沂爲悲說見御覽
尤謬

禮書云韋昭釋國語杜預釋左傳皆以鑄爲小鐘特康成
曰鑄如鐘而大孫炎許慎沈約之徒亦以爲大鑄然爾雅
大鐘謂之鑪不謂之鑄又儀禮鑄從薄與越鑄之鑄同則
鑄爲小鐘於理或然

剽音瓢棧音蓋坊本脫剽亦作剽

李巡解大簫謂之言云大簫聲大者言言也解小簫謂之
筴云小者聲揚而小故言筴筴小也二說俱穿鑿無理

舍人云大笙聲眾而高也小者音相和也塤大者如鵝子
聲合黃鐘大呂小者如雞子聲合大簇夾鐘大管聲高大
故曰箛箛高也中者聲精密故曰篴篴密也小者聲音清
妙也中簫其聲適仲呂也小者形細小故曰箛也按此乃
李巡孫炎所從本而疏不采何也

禮書云止欲戒止於其早也簫欲脩潔於其後也

周禮疏云今歐陽尚書說曰欽若昊天夏日蒼天秋日杳
天冬曰上天總謂皇天爾雅亦然爾雅者孔子門人作以
釋六義之文言蓋不悞矣

農師云於春言其色於夏言其氣於秋言其情於冬言其位穹言形蒼言色也

謂之景風鄭云據下文敵體則此上容有二句亡焉

玉燭李巡云人君德美如玉而明如燭郭云道光照疏云道言也言四時和氣溫潤明照故曰玉燭今俗以道字作道德字解連用道光二字大謬

鄭云甲本戈甲乙本魚腸丙本魚尾丁本蠶尾戊本武也巳本几也庚鬲也辛被罪也壬懷妊也癸草木實也

鄭云子人之子也丑手之械也寅臙也卯牖也辰未詳本義巳蛇屬午未詳本義未木之滋也申特簡也酉卣也戌與戚同意亥豕屬也十日十二辰惟巳亥有義餘竝假借

歲陽歲名史記字有與爾雅不同者焉逢端蒙游兆又作游桃

疆梧徒維戊祝犁已商橫章橫艾王尙章癸單丹善闕

遇焉賁安即單大芒落又作大汁又作洽芮漢即涖作罟

兩音淹茂洪氏所云赤奪若

史記注所載有邢疏所不采者攝提格李巡云言萬物承陽而起故曰攝提格格起也單闕李巡云言陽氣推萬物而起故曰單闕單盡也闕止也執徐李巡云伏蟄之物皆敷舒而出故曰執徐敦牂孫炎云敦盛也牂壯也言萬物壯盛也協洽李巡云陰陽化生萬物和合故曰協洽協和也洽合也涖灘孫炎云萬物吐秀傾垂之貌闕茂李巡云言萬物皆蔽冒故曰闕茂闕蔽也茂冒也大淵獻孫炎云

淵深也大獻萬物於深蓋謂藏之於外也困敦孫炎云混沌也言萬物初萌混沌於黃泉之下也韋昭云敦音頓赤奮若李巡云言陽氣奮迅萬物而起無不若其性奮迅也若順也作噩李巡云作噩皆物芒枝起之貌司馬貞云噩音鄂案下文作作有芒則巡解亦近

史記注姚察曰大荒落言萬物皆熾盛而大出霍然落之故曰大荒落孔文祥曰以歲在寅正月出東方爲眾星之紀以攝提宿故曰攝提以其爲歲月之首起於孟陬故曰格格正也二家不注爾雅蓋史記注也

農師云于文禾千爲秊步戌爲歲蓋年取禾之一熟而歲騎兩稔故步戌至戌謂之歲也

史記索隱云畢聚聚音陬謂月值畢及娵訾也畢月雄也聚月雌也按此蓋甲子也正月爲陬爾時沿周正之稱故曰畢陬竝非以月在陬訾之故若陬訾則十月矣小司馬誤古人聚陬娵三字通

按廣韻爾雅三月爲寗今文作寗

詩鄭箋四月爲除正義云今爾雅作余李巡云四月萬物皆生枝葉故曰余余舒也孫炎曰物之枝葉敷舒然則鄭引爾雅當同李巡等除余字雖異音實同也

周禮釋文爾雅十二月爲涂音徒今註作難荼二字是假借耳當依爾雅讀

農師云凱風言其情谷風言其自涼風言其德泰風言其

交景風者天地中和之氣也

文選註爾雅焱或爲此魃又引風飄謂之魃與今本不同又云焱上也風從下升也不知誰氏之註

文選注引天氣下地氣不應曰事今本地下無氣字農師云霓爲挈貳蓋言二淮南子曰天二氣則成虹

庭霆通

農師云震雷謂之劈歷震言所以振物也其緩者霆說文曰雷之餘聲鈴鈴所以挺出萬物也先儒或以霆爲疾雷蓋爾雅疾雷謂之霆霓先儒豈讀此故誤歟亦或謂之電者霆亦非電也蓋音庭則爲雷音蜓則爲電淮南子曰陰陽相薄感而爲雷激而爲霆又曰疾雷不及掩耳疾霆不

暇掩目皆宜音電

農師云爾雅雨霓爲霄雪霓从覡省詩曰見覡曰消蓋雪以微溫搏之故散而成霓釋文曰霰稷雪也閩俗謂之米雪言其霰粒如米所謂稷雪義蓋如此按今俗呼石雪亦呼雪珠

鄭云爾雅所釋盡本詩書見爾雅自可見不待言矣離騷云令飄風兮先驅使凍雨兮灑塵故釋風雨云暴雨謂之凍此句專爲離騷釋知爾雅在離騷後不在離騷前

李氏云大辰蒼龍宿之體最爲明故曰房心尾也大火蒼龍宿之心以候四時故曰大辰見左傳正義及公羊傳疏文選海賦北灑天墟注引爾雅云北陸天墟也按爾雅北

陸虛也卽指北方虛宿此云天墟

詩正義引李巡云噉陰氣獨起陽氣必止故曰畢畢上也
孫炎謂以綱名畢郭謂以畢名綱郭說是也

孫炎云畢昴之間日月五星出入要道若津梁

按左傳正義引孫炎云龍星明者以爲時候故曰大辰公
羊傳疏引孫氏郭氏云大火心也在中最明故時候主焉
又引孫氏郭氏云北極天之中以正四時觀此數條則郭
悉依孫說

厚齋云古詩黃姑織女時相見之句此所云黃姑卽河鼓
也吳音誤而然

公羊傳疏云爾雅不言心爲大火文不備也

鄭云此篇大槩釋十二辰所次據壽星大辰析木星紀元
枵娥訾降婁大梁實沈鶉首鶉火鶉尾釋星當備載不應
遺卻實沈鶉首鶉尾恐是簡編之失

機槍他書从手

史記天官書索隱引爾雅須女謂之務女或作婺字按今
本星名闕此句

祭天曰燔柴柴下亦从示作柴

李巡云祭地以玉埋地中祭山以黃玉及璧以牋置几上
遙遙而眠之若縣故曰牋縣祭風以牲頭蹄及皮破之以
祭故曰牋

祭星曰布史記封禪書諸布索隱以爲祭星之屬

小爾雅祭山川曰祈沈祈與廢同周禮釋文音九委反依爾雅讀

周禮註云鄭司農讀貉爲禡杜子春讀貉爲百爾所思之百亦或爲禡疏云書亦爲禡者毛詩爾雅皆爲此字疏又云爾雅云是類是禡故知貉爲師祭也鄭云其神黃帝者王制云天子將出類乎上帝註云帝謂五德之帝是黃帝以德配類按此則禡卽類類與禡禡與貉同一祭也

禮記正義云舜之攝位亦類乎上帝並非師祭皆稱類者蓋爾雅所釋多爲釋詩以皇矣云是類是禡止釋皇矣類禡爲師祭不謂餘文類皆爲師祭但類者以事類告天若以攝位事類告天亦謂之爲類若以巡守事類告天亦謂

之爲類故異義

禴玉篇亦作𦵏

德輝按原抄作𦵏殊筆校改作𦵏又眉批云𦵏𦵏俱無考當是盧抱經校

按孫炎等註爾雅皆以禴爲五年一大祭若左氏說及杜元凱皆以爲三年一大祭三年之禴卽大禴也從左傳爲是五年之禴乃大禴也從爾雅爲是

公羊傳注殷曰彤周曰繹疏云釋天文案郭氏爾雅其下文仍有夏曰復肸之文而何氏不言之者正以諸家爾雅悉無此言故不引之

公羊傳出曰祠兵疏云卽爾雅出爲治兵之文也今書祠兵卽是出竟之義

周禮疏云九旗之帛皆用絳以周尙赤故爾雅云纁帛縹

也其旒之下旒似不用絳故爾雅云緇廣充幅長尋曰旒
繼旒曰旒詩白旒央央左傳少帛綉枝旒旌是旌旒色異
也爾雅別云素錦綢杠素陞龍練旒九彼旒於喪葬之期
也

公羊傳註繒廣充幅長尋曰旒繼旒如燕尾曰旒加文章
曰旒錯鳥革曰旒注旒首曰旒疏云此注皆爾雅釋天文
其間稍有不同者蓋所見異或何氏潤色之

左傳正義云旒是旂身旒是旂尾

李巡云有鈴曰旒以鈴置旒端

錯鳥革曰旒李巡云以革爲之置於旒端郭云此謂合剝
鳥皮毛置之竿頭卽禮記云載鴻及鳴鳶鄭云錯雜以五

采也革急也畫急疾之鳥於繆蓋鷹隼之屬鄭說本孫炎
陳氏祥道云太常而下五旗皆畫則旗畫鳥隼信矣郭璞
所釋卽禮記載鴻及鳴鳶其說非也

文選注作錯鳥隼爲旗又引爾雅熊虎爲旂當是注中語
河南曰豫州郭云自河南至漢鄭於漢上增一江字當是
舊本傳寫脫落而鄭增也

雒州鄭云東距西河西距黑水兗州鄭云東南距濟西北
距河

李巡解九州之名似亦近鑿卻微有理

禹別九州有青徐梁而無幽并營是夏制也周禮周公所
作有青并幽而無徐梁營是周制也此有徐幽營而無青

梁并是殷制也觀疏數語較公羊傳疏最爲簡捷自是專門之學

大野鄭云在鉅野縣東北鉅野今濟州治東晉在高平郡今山東曹州府

鉅野縣大陸鄭云今懷州修武縣吳澤是東晉在汲郡今河南懷慶府修武縣

楊陟鄭云今隴西汧源東晉在扶風郡今陝西鳳翔府汧陽縣孟諸鄭云在

南京虞城縣西北十里東晉在梁國睢陽縣東北今河南歸德府虞城縣楚有雲

夢鄭云江北爲雲江南爲夢雲今之玉沙監利景陵等縣

是夢今之公安石首建寧等縣是東晉南郡華容縣東南巴邱湖是又南郡枝江

縣西有雲夢城江夏安陸縣東南亦有夢城蓋此澤方九百故跨江南北也今湖北武昌府荊州府湖南岳州府等處

具區鄭云今平江吳縣南太湖今江南蘇州府震澤縣海隅鄭云

齊地東濱海今山東登州府萊州府等處昭餘祁鄭云太原鄆陵縣北

九澤是按此仍郭注而郭仍周禮注也燕圃田鄭云一名

原圃在開封中牟縣西北七里鄭州管城縣東三里今屬河南

開封府焦瓠鄭云郭注今扶風池陽縣瓠中是今在隴州汧

陽縣北今陝西鳳翔府汧陽縣
按此與楊陟相距不遠

楊陟之陟漢書地理志作紆以為冀州與此異後漢書注

引爾雅亦作紆海隅之隅廣韻作隅

雁門山鄭云今代州今山西溴梁鄭云溴水出河內軹縣

東南至温按軹唐省入濟源今隸河陽今河南懷慶府濟源縣醫無

閭鄭云在遼東今奉天錦州府廣寧縣會稽山鄭云在今越州今浙江紹興府

興府會稽縣梁山鄭云在汝州梁縣今河南汝州華山鄭云在今華

陰今陝西華陰縣霍山鄭云在晉州霍邑今山西平陽府霍州

李巡云藪澤之別名也

阢辛信兩音

河墳孫綽天台山賦與詩之汝墳淮墳竝稱三墳

珣玕琪玕有俱切从干者誤

斥山之斥當作斥音尺又充夜切

東方之美者一節與周禮職方各山鎮多不符如以梁山爲南霍山爲西岱嶽爲中之屬多不正言其方尤不可解序謂此書乃叔孫通梁文所附今以此節考之蓋叔孫氏爲齊菑川人因妄以其國岱嶽爲中而并易其四方之位如此則其妄不待辨而自明矣按姜氏此說頗有根據厚齋云漢食貨志太公爲周立九府圜法顏注周官太府

王府內府外府泉府天府職內職金職幣皆掌財幣之官
故曰九府愚按爾雅醫無閭之珣玕琪會稽之竹箭梁山
之犀象華山之金石霍山之珠玉崑崙之璆琳琅玕幽都
之筋角斥山之文皮岱嶽之五穀魚鹽是謂九府五峯胡
氏皇王大紀所述與爾雅同鹽鐵論曰管仲設九府微山
海然則九府太公立之管仲設之其名列於爾雅蓋卽管
氏書也大紀之說得之顏注恐非

鄂州云沈括使遼稱契丹北境慶州之地大漠中有跳兔
形皆兔也但前足纔寸許後則一尺行則用後足跳一躍
數尺止則蹶然仆地捕得數頭持歸此卽蹙也蓋自能跳
躍亦能與同類相負其行特假於邛邛距虛說苑孔子曰

蛩蛩距虛見人將來必負蟹以走然則負蟹者或蛩蛩或
距虛二物不相須也郭氏又以蟹鼠前兔後蛩蛩距虛當
鼠後而兔前前高不得取甘草故須蟹食之按蛩蛩距虛
相如賦以爲狡獸昔之言駿馬類距虛以其前軒而後輕
也豈宜後足若鼠耶且蟹惟前短而後長故不能走而有
待於物然猶獸之長理若前長而後短豈直不能負物而
已哉便無是理也又狼亦負狼狼前足短而狼後足長自
如邛邛距虛不當短其後也周書王會獨鹿國獻邛邛距
虛孤竹獻距虛釋者以爲邛邛似鼠距虛負而走距虛者
野獸驢羸之屬則是以邛邛爲蟹也與爾雅說苑及詞人
之說異今不取郭璞曰距虛卽邛邛變文互言耳

鄂州云枳首蛇者歧頭一頭無目無口俱能行爾雅以爲中央之異氣東南多有者不獨在中央也

公羊傳上平曰原下平曰隰疏云釋地廣平曰原李氏曰謂土地寬博而平正者名原然則此言上平蓋欲對隰言之故謂之上平其實與爾雅廣平不異

孫炎云可食謂有井田也陸阿山田可種穀者亦曰原也謂彼陵阿之間可食之地非廣平也

厚齋云西至於邠國朱文公曰邠國近在秦隴非絕遠之地愚按說文引爾雅曰西至汭國謂四極汭西極之水也府巾切

鄭云邠國非太王去邠之地

鄭云日下疑卽日本

成猶層也山海經多用此字又周禮註鄭司農引爾雅釋爲壇三成云三成三重也

周禮疏云爾雅山邱別釋則邱無石者也

鄭云當日非人爲之謂之邱失謂之二文

敦邱服虔云音頓頓邱也

水經注以淄水出營邱前又云與爾雅符疑誤

邇迤一作崩崴

文選注應劭云前高陟邱陟音旄

王氏質曰邱之多草木者曰旄

宛邱

黃氏震曰旁高中下則登眺未便今陳國於此聚遊郭說爲是

鄭云今爲縣陳州治

今河南陳州府淮寧縣

潛邱鄭云郭注今在太原晉陽縣

今山西太原府陽曲

縣州黎邱鄭云今在壽春縣

今江南鳳陽府壽州

下不濬郭云不發辭鄭云不者衍字鄭從孫炎說

隈依疏當音鞠李巡說

畢堂牆鄭云今長安縣有畢陌

易正義云獭豕之豸褚氏曰獭除也獭之爲除爾雅无訓考爾雅云獭大防則獭是隄防之義此獭其豸謂防止其豸按今本獭作墳孔氏或所見本異否則不引獭而引大防殊附會穿鑿矣

周禮疏云爾雅江河淮濟爲四瀆爲定五嶽不定者周國在雍州時爲西嶽故權立吳山以爲西嶽非常法爾雅不載以東都爲定故爾雅載之也

坯一音平又音培字亦作坏

扈亦音峴

小山岌大山

句

岿

句

大山宮小山

句

霍

句

小山別大山

句

鮮

句

依注當如此讀酈道元解宮亭乃引爾雅大山曰宮

殆不深考之過

明人詩中亦有誤用者蓋仍酈氏

蜀鄭云蜀山今濟州按我邑有蜀山亦以離羣山而獨立
得名見隋書地理志又湖州有別鮮山義亦本此

文選注上正章章作障

翠微後說爲長謂山氣青縹也

詩正義云屨屨意或作差我箋作崔嵬雖字與爾雅小異
義實同也

密說文云山脊也

文選注重甌隙甌作嶽毛傳以小山別於大山爲嶽孔氏曰上天下小爲嶽與皇矣山曰鮮義別隙李巡云阪也詩正義云山岸曰隙

文選長笛賦嶮壑澮峴注引爾雅小山別大山曰嶮又按毛傳小山別大山曰鮮說文音息淺反又音仙當是所見異本鄭箋不從毛以鮮原爲善原廣平之地故注不引許白雲曰毛氏爾雅二說正相反恐以爾雅爲是蓋崔嵬字上從山𠂔字旁從石有在上在外之意

多草木𠂔無草木𠂔石戴土謂之崔嵬土戴石爲𠂔毛傳引之互相反非傳寫之誤卽各有師承也王肅解依爾雅

澗一作澗又作澗又作澗

梁山鄭云在同州夏陽縣北

今陝西同州府韓城縣

一見一否一有水一無水鄭云一猶時也

澗水經注引之作澗史記索隱作雍

渾古澗字見李冰官堰碑鄭云今錢塘亦有此語

呂忱字林謂異出同流爲漢水

見水經注

蓋誤合上下文

澗一作澗

厲亦作瀾說文作砮

李巡云濟度也水深則厲水淺則揭衣而渡也不解衣而渡水曰厲孫炎云揭舉衣裳也以衣涉水濡禪也

赫緯同

周禮疏云注瀆曰川者爾雅無此言鄭以義增之耳
公羊疏引李巡云水出於山入於川爲谿水相屬曰谷按
下句與今疏所引不同

按九河之名見於爾雅李巡孫炎所注及許商之說詳矣
徒駭胡蘇鬲津俱在千乘郡漢時已得其三唐元和志又
得其三馬頰太史鉤盤也宋歐陽忞輿地記又得其一簡
潔也一河或被以兩名新河或蒙以故號故後人所得反
多於前蓋無穿鑿之弊耶

乾隆丁未五月廿三日抱經閱

原抄有此硃筆一行
抱經盧文弨號也

爾雅補注卷二